

DISSERTATIO MEDICA

INAUGURALIS,

DE

HAEMORRHAGIIS SPONTANEIS
IN GENERE,

QUAM

ANNUENTE DEO TER OPT. MAX.

Ex Auctoritate MAGNIFICI RECTORIS

D. FRIDERICI BERNARDI ALBINI,

A.L.M. PHILOSOPHIÆ ET MED. DOCTORIS, ANATOMES
ET CHIRURGIÆ IN ACADEMIA LUGDUNO BATAVA
PROFESSORIS ORDINARIJ,

NEC NON

Amplissimi SENATUS ACADEMICI *Consensu,*
& *Nobilissimæ* FACULTATIS MEDICÆ *Decreto,*

PRO GRADU DOCTORATUS,

Summisque in MEDICINA Honoribus & Privilegiis
rite ac legitime consequendis,

Eruditorum Examini submittit

JACOBUS VAN WAGENINGEN,

Dordracensis.

Ad diem 7. Augusti 1754. hora locoque solitis.



LUGDUNI BATAVORUM,

Apud NICOLAUM MOENS, 1754.

NOBILISSIMO GRAVISSIMO

atque

DOCTISSIMO

VIRO

D. HENRICO VAN CONVENT,

MED. DOCT.

ET PRACTICO, EXPERTISSIMO, REIPUBLICAE
DORDRACENAE SENATORI AC JUDICI

&c. &c.


FAUTORI SUO HONORATISSIMO AD EXTREMUM
VITAE HALITUM COLENDO ATQUE
VENERANDO.

*Hanc dissertationem in-
auguralem venerabundus
devovet & consecrat*

AUCTOR.

Digitized by the Internet Archive
in 2019 with funding from
Wellcome Library

<https://archive.org/details/b3078430x>



DISSERTATIO MEDICA

INAUGURALIS,

DE

HAEMORRHAGIIS SPONTANEIS
IN GENERE,

§. I.

Quum diu haesisset mihi aqua, quemnam morbum pro specimine aliquo eligerem, non ut aliquid novi in lucem proferrem, sed tantum ut legibus academicis satisfacerem; tandem arrisit mihi illa materia scilicet de Haemorrhagiis spontaneis, quia mihi videtur multorum morborum chronicorum esse causa; si in principio hujus morbi mala instituatur curatio, post se trahit dira mala non facile superanda, quia non solum respiciendum est medico ad tollendam haemorrhagiam sub paroxysmo, sed etiam ad dispositionem extra paroxysmum.

§. II.

Ut ordinem quendam teneam, ab nominis explicatione incipere cogar. *αιμορραγία* est vocabulum graecum quod deri-

vatur ab αἷμα sanguis & ῥήγνυμι erumpo alii ab αἷμα sanguis & ῥέω fluo. generaliter quamcumque sanguinis effusionem extra corpus denotat; atque per sponte non intelligo ut Chemicis solitum est, quando fiunt mutationes in corpore, aere, colore, aquaque, dum haec tria in suo statu naturali sunt, nec per artem aliquid mutatur, sed intelligo per sponte, quando haemorrhagiae producuntur a causis internis, quasi a natura, ab anima dicit Stahlius, sed non recte; quia tunc in nostram potestatem redigimus illum morbum, quod quotidiana experientia contrarium nos docet.

§. I I I.

Itaque per haemorrhagias spontaneas mente comprehendo, quando sanguinis effusio fit, non a causis violentis externis applicatis, sed a causis internis, quae solidis in partibus determinatos producunt motus, quorum ope sanguis majori in copia, ad unam corporis nostri determinatur partem, ita ut saepe fiat eruptio, ullo sine dolore & anima quasi inscia sit hujus excretionis.

§. I V.

Loca in quibus haemorrhagiae fiunt, sunt diversa & dividi possunt in sueta & in magis insueta. Sueta loca sunt nares, pulmones, aësofagus, ventriculus, renes, vasa haemorrhoidalia, uterus, vaginaque.

Magis insueta sunt per oculorum cantos, gingivas, dentes, os, mammas, umbilicum, penem ac inguinem, etiam per manum, pedem, talum, cutimque ut observationibus Stalp. van der Wiel & aliorum constat.

§. V.

Ratione aetatis dicendum erit, quod in pueris & adolescentibus maxime narium haemorrhagiae, incipiunt saepe ab anno quarto

quarto ad annum vigesimum, in juvenibus haemoptises ab vigesimo ad trigesimum quintum annum, at in consistente aetate haemorrhoides & vomitus cruentus ad annum quadragesimum, in aetate provectiori mictus cruentus saepe observantur, quod etiam ab Hippocrate observatum & descriptum est in aphorismis 27. 29. 30. sect. 3.

§. V I.

Inter scriptores hac de re multum disputatum est, scilicet, an sanguis ex venis, vel arteriis ruptis veniat, & adhuc latere videtur: Etmullerus in tomo 3. in capite de haemorrhagiis in genere probare studet, arterias rumpi & dicit, *patet ex eo quod omnes haemorrhagiae V. G. narium fiant stillatim guttatimque, id quod liquidissime patet venire ex arteriis nunc dilatatis, nunc subsidentibus, non autem ex venis, ratione pulsus* atque paulo post in eodem paragrapho dicit etiam *patere in artereotomiis, in quibus etiam subsaltim tantum &, repetitis vicibus pro pulsus ratione sanguis erumpit.*

Sed non sufficere videntur mihi haec argumenta ad hoc probandum.

1^{mo}. quia sanguis ex nare guttatim effluit, non demonstrat hoc ex arteriis guttatim fluere, potest sanguis aequaliter fluere ex vasis & in nare colligi & sic guttatim effluere.

2^o. quod pateret ex arteriotomiis, non videtur adeo clare demonstratum, quaestio est an non sit differentia inter illas arterias magnas respectu aliarum, in quibus arteriotomia instituitur & in illis, quae rumpuntur in haemorrhagiis a causis internis, idest an sanguis per oscillationes vasorum in vasa majora eodem modo propellatur, quam in minora.

3^o. Omnibus chirurgicis est notum, quam difficulter minores arteriae consolidentur & praeterea videmus, quando congestiones fiunt ad caput, quod omnes venae tumescunt, arteriae non adeo apparent, Praeterea si nunc V. G. ex haemorrhoidibus sumamus exemplum, tunc videmus quod constat per observationes, sanguinem ex venis venire, apud Vesalium legi-
tur

exemplum viri ex haemorrhoidibus mortui, venam haemorrhoidalem pollicis capacem, & sanguine turgidam continentem, sunt etiam qui ex sanguinis colore probare student, an ex venis, vel ex arteriis veniat, si E. G. sanguis non est floridus, sed nigricans, tunc dicunt ex venis; sed argumenta ab una & ab altera parte videntur mihi non satis clara, ut de iis judicem, itaque in medio relinquam, tantum dicam forte uno in casu rumpi venas, in altero, arterias.

§. V I I.

Subjecta haemorrhagiis obnoxia, sunt maxime plethorici & truncati; corporum nativitas etiam multum confert, quae a parentibus in liberos transfertur, quae corporis habitum mollioris, spangiosioris, atque texturae tenerioris habent, praesertim quae florent aetate sana & florida constitutione & ingenio excitato, in genere omnia subjecta quae multis animi perturbationibus obnoxia sunt, ut irae, gaudio, terrori, moerori &c. etiam quae spirituosius, aromaticisque abutuntur; intempestivus quoque balneorum, sudoriferorum, purgantiumque usus etiam iis accenseri meretur.

§. V I I I.

Hisce praemissis haemorrhagiarum causas aggressus sum, quae sunt vel proximae vel remotae, atque primo agam de causa proxima dein de remotis, sed quia saepe inter se controversantur medici de causae proximae definitione, dicam quid mente comprehendo per causam proximam.

Causa proxima est talis, quando illa ponitur, ponitur directe, morbus, integra & sufficiens semper, vocatur etiam causa efficiens vel formalis.

Multi medici confundunt causam materiale cum causa efficiente, cum tamen magna detur differentia.

Causa materialis ponenda est inter remotas, nil producit mali, nisi in actum deducatur a causa efficiente.

Multi

Multi veteres medici atque etiam recentiores pro causa proxima haemorrhagiarum agnoverunt plethoram, ab illis nulla distinctio est facta inter causam materialem & efficientem, sed si haec distinctio sit observanda, credo non difficile esse demonstratu, plethoram nil esse aliud in haemorrhagiis quam causam materialem, & causam efficientem admodum esse distinctam ab illa materiali.

§. I X.

Videamus nunc an demonstrare possimus, plethoram causam proximam non esse, & saltem esse causam materialem huius morbi.

Incipiam a foeminis, quando E. G. menses non rite fluunt, venae sectio a medico institui potest, ut sic auferatur plethora, tunc & tolli deberet effectus, sed quid observatur? extremorum refrigerium, perspiratio est impedita, alvus saepe est stipata, dolor circa partes genitales, lumborum dolor &c. omnia illa symptomata manent, si nunc plethora esset causa, tunc quando venae sectio instituitur, mitigari deberent illa symptomata, sed quid praeterea observantur, quando venae sectio instituitur, saepe menses fluere incipiunt, ut patet ex Ephimer. nat. curios. cent 6. ubi foemina maximis hypochondriacis doloribus cruciata sibi venam aperiri curat, statim subsecuta est eruptio mensium, & tunc omnia symptomata mitigantur, sed si nunc a sola plethora dependeat cur menses fluunt, cur non omnia symptomata mitigantur a sola venae sectione.

In fasciculo observationum Corn. Trioen pag. 49. legitur.

Ab hinc aliquot annis effraenatae uterini fluxus evacuationis memorabile observavi exemplum in muliere quadam quae per sedecim annos post puerperium continua laboraverat, eadem adeo, ut viribus omnimodo exhausta, ematiata ac enervis restiterit.

Nemo credere potest per sedecim annos post puerperium plethoram esse causam huius excretionis: sic etiam juvenem

novi, qui in tempore aestivo saepe laborat haemorrhagia nasum, instituta est venae sectio & multoties est repetita ullo sine fructu atque debilitas tanta erat ob amissam sanguinis copiam, ut medicus non instituere amplius auderet venae sectionem, tamen non compescitur haemorrhagia, an nunc in illo homine dicere possumus plethoram esse causam? si bene advertimus, animus concedendi non est.

Sic Clar. Winterus praeceptor meus carissimus, Narrat casum foeminae, quae adeo haemorrhoidibus erat obnoxia ut intra octo dies ultra septem vel octo libras sanguinis evacuetur, paucis tunc post diebus fluxere menstrua, quare nunc menses fluunt in illa foemina, an hoc fit quia plethora adest?

Sed afferam nunc alia argumenta, in quibus nullum indicium esse potest plethorae E. G. sunt puellae quae admodum sunt debiles, pallent, ambulare non possunt, nisi magna cum fatigatione, non nisi cruda absurdaque saepe edunt ut sunt calx, terra, creta atque similia & licet alimentis bonis utantur, vires adeo sunt debiles, ut nulla digestio bona fieri possit; in hisce tamen observatur menstruatio, licet in minori sit quantitate, in illis nunc non dicere possumus plethoram adesse.

Etiam in mulieribus phthisicis, febre, & venae sectionibus saepe repetitis debilitatis, nutritio fieri non potest itaque & sanguificatio imminuitur, debilitantur quam maxime illi aegri, ita saepe ut pedibus sese sustinere nequeant, & tamen menses fluere observatum est, an hoc possimus plethorae adscribere, sed si argumenta haec non sufficere videantur afferam alia.

Supponamus nunc plethoram esse causam haemorrhagiarum proximam, tunc illa sanguinis copia, quae magis quam par est, aequalis esse debet distributa per nostrum corpus, sed hoc non obtinet, sanguis fertur ad unum alterumve locum corporis nostri, unde haec determinatio? illi, qui plethoram pro causa proxima agnoverunt, dicunt hoc quaerendum esse in structura organica E. G. in laxitate, in colore majori, in pressio-

pressione & in varia distributione vasorum & multa sunt alia; praeterea dicunt hanc structuram obtinere in naribus, pulmone, renibus, vasis haemorrhoidalibus, utero; Concedere possum structuram organicam aliquid facere, sed non, quod a sola plethora & structura organica totum negotium dependeat.

1°. In foemina menstruante fit illa excretio & cessat sponte, structura manet, cur non effluere pergit? si Dicas, Plethoram nunc esse sublatam, tamen vasa manent aperta & praeterea ex argumentis ante propositis, patet licet plethora sit ablata, excretionem sanguinis manere, quid nunc causae est, ut sistatur? ex illa hypothese explicare non possum.

Patet etiam in hominibus, qui assueti sunt haemorrhagiae narium, quasi habituali factae, quae quando consueta quantitas est excreta, illico cessat.

2°. In illis locis non solum observatur haemorrhagia, in quibus suspicio nascitur de structura organica, quae appellantur loca sueta, sed etiam in illis locis fit, ubi nulla suspicio esse potest de structura & dicuntur magis insueta ut §. 4. videri potest.

Afferam nunc observationes in quibus clare patet a structura organica non dependere.

In observationibus Starp. van der Wiel in Libro 1mo. observ. 19. legitur casus *filiae cujusdam, cum paulo cessant menstrua, irascitur sanguis guttatim lacrymarum instar per genas volvitur ex inferiorum palpebrarum oris proveniens.*

An nunc dicere possimus hoc quaerendum esse in structura palpebrarum? minime credo, si illa structura antea jam adfuisse, an ponendum sit nobis, uno in momento illam structuram adeo esse mutatam ut apta sit ad haemorrhagiam producendam?

Sed adhuc unum exemplum afferam, antequam hac de re subsistam, in eodem observatore, observat. 79. legitur.

Adriana gubernatrix jam prope quadragenaria, sed corpore macra, tenuisque, nec bile tantum abundans, sed & iracundior, anno 1644 ita offensa erat animo, quo tempore fluxu laborabat

menstruo ut prae maxima mentis perturbatione e papillis prorumpens reliquum corpus proluerit sanguis.

In his duobus exemplis propositis uno in momento sanguis ab utero ad papillas & palpebras determinatur; an nunc hoc phenomenon ex structura vel ex plethora explicandum sit? non video: sed haec sufficere credo, ad probandum, plethoram non esse causam proximam haemorrhagiarum, multa adhuc alia B. L. exempla apud eundem & alios observatores legere potes.

§. X.

Sic nunc ostendi plethoram non esse haemorrhagianum causam proximam, dein illam causam in structura organica non quaerendam esse, quia in omni corporis nostri parte fiunt haemorrhagiae, licet a natura loca fatis sint debilia, licet sint fortiora & saepe fiunt uno in momento ut videmus ab ira, itaque quaerenda est illa causa, quae facit ut sanguis, licet in moderata quantitate adsit, magis determinetur ad illa, quam ad alia loca; sed ostendi illam causam non quaerendam esse in structura organica, neque in sanguinis quantitate, itaque nil superest quam ut examinemus principium vitale male affectum vulgo dictum spasmus.

§. XI.

Haemorrhagiarum causa proxima mihi videtur esse spasmus, atque concipio quod fiunt haemorrhagiae spontaneae hoc modo, vasa Aliqua in parte spasmodice afficiuntur, ita ut liber sanguinis transitus prohibeatur per venas & cum vicina in parte sanguis accumuletur, nascitur congestio, per congestionem vasa expanduntur, & si haec expansio accrescat, ruptura sequitur.

§. XII.

§. XII.

1^o. nunc ostendam, hanc sententiam non esse aliquid novi sed quod praestantissimi viri, qui hac de re scripserunt adhaerent parti meae.

2^o. probare cogar ex observationibus a fidelissimis observatoribus desumptis.

1^o. multi auctores mihi assentire videntur in hac re, V. G. Hoffmannus in tomo 2^o. in capite de haemorrhagiis in genere §. 10, dicit sententiam veterum non valere, & praeterea dicit *sed potius ab extra ab intus converso motu atque inaequalitate circulationis sanguinis oriri: id quod efficitur, quando certae partes, praesertim extremae & a corde valde remotae, intensiori fibrarum structura ac contractione ita angustantur, ut sanguis per venas refluxere nequeat, sed harum aucta systole majori copia & impetu ad alia loca eaque inconvenientia transferatur.*

Quod per intensiorem fibrarum strictionem nobis intelligendi sint spasmi, neminem dubitare credo, itaque patet, spasum pro causa proxima agnotum fuisse ab Hoffmanno per Distinctionem adhibitam in §. 8^{vo}. quam & eam adhibuit Clar. Stahlius scilicet in materialem & instrumentalem causam; dicit enim in pathologia sua in membro. 2^{do}. in capite de vero habitu causali ad haemorrhagias producendum §. 3.

Causam haemorrhagiarum tam materialem quam occasionalem, exceptis violentis haemorrhagiis, esse simplicius plethoram, consentiunt fere omnes antiquiores. praeterea in §. 4. dicit plethoram totum negotium non exhaustire & hoc patere ex multis exemplis plethoricorum, qui per plures annos immunes vixerunt & nil mali ex inde contraxerunt, nisi aliae accedant nunc in eodem Capite §. 19. dicit.

Causae instrumentales ad producendum ipsum actum haemorrhagiae sunt motus tonici auctiores, quibus sanguis tum ad illam regionem aliquando latius, tum magis privatim ad immediatum lo-

cum exitus ita constringitur, ut ibi distentione vasorum & denique orificiorum extremorum, per motum talem expressionis, exitus ita obtineatur.

Non erit negandum, quod per motum tonicum, nobis spasmus sit intelligendus. De hac sententia etiam legere potes L. B. Etmullerum in tomo 3. in capite de haemorrhagiis in genere atque etiam Nenterum in Pathologia.

En nunc patet hanc sententiam non esse novam atque convenire cum praestantissimis in hac arte viris.

§. X I V.

2^{um}. erat, etiam constare per observationes.

Observatum est quod omnes animi affectiones producere possint haemorrhagias.

Hoc videmus in hominibus haemorrhagias passis, in quibus a levi animi perturbatione prorumpunt, etiam in foeminis quando menses instant, saepe per animi perturbationes erumpunt.

In Pathologia Georg. Philippi Nenteri in Sectione 2. in capite 1^{mo}. legitur exemplum juvenis 24 annorum qui sanguineo-cholericus a parentibus plethoricis natus, diaeta utitur laudabili & cibos bonae digestionis cum vino, magna in copia quotidie ingerit, ac vitam simul agit sedentariam: redditur hinc summe plethoricus: tandem corpus maxime motu exercens & gravissima ira excandescens subito magnam sanguinis floridi & spumescantis copiam ore absque vomitu rejicit & magnum vitae periculum incurrit.

En exemplum in quo juvenis admodum erat plethoricus, sed ex plethora nil mali sentit, sed irascebatur, quid tunc observatur? sanguis magis ad interiora determinatur & haemorrhagia nascitur, quid nunc ira uno in momento producere potest, nil aliud credo quam spasmum.

Nunc afferam exempla in quibus nullum indicium est plethorae atque tamen a sola ira producitur haemorrhagia.

Ex Stalp. van der Wiel in §. 9. allegavi duo exempla de foeminis menstrua passis a sola ira, unam per palpebras, alteram per papillas uno in momento erumpere haemorrhagiam, quid nunc causae est cur sanguis ab utero ad palpebras & papillas determinatur, an aliquis dubitare possit? quin ab ira producantur spasmi & quin hi spasmi producant congestiones.

In Joseph. Lanfonio in tomo 2do obs. 219. *Menstruas purgationes per Oculos quovis mense veluti lacrymas sanguineas excretas vidit Remb. Dodonaeus. ego vero fletum sanguineum in adolescente observavi, quoties cumque data causa ad fletum incitabatur, rubore insigni oculi turgebant & inde sanguineae guttulae, veluti cruoris rivus, exhibant.*

En nunc duo exempla in quibus per minima vascula haemorrhagia fit, an hoc nunc fieri possit? nisi ad sit causa determinans & quidem causa quae illico venit & illico recedere, sed etiam manere potest, an nunc aliam afferre possimus causam quam spasmus? Exemplum etiam constat in introductione Georg. Phyl. Nenteri pag. 33. sed antequam casum narret, dicit *Nota mihi est vidua triginta & aliquot annorum, in qua manifestissime motus illi activi observari possunt.*

Haec alias langiori mensium fluxui obnoxia erat, cum vero hicque sensim imminutus fuerit, jam per integrum annum & quod excurrit, sentit dolorem spasmodicum in hypochondrio dextro, quem statim motus versus sinistrum & tandem ex hypochondrio versus anum cum titillatione molesta sequitur, Multa exempla apud eundem auctorem invenire potes.

Apud Joseph. Lanfonium in libro 2do observ. 224. legitur exemplum militis, obstructionibus viscerum obnoxii & feбри mali moris correpti, medicam imploravit opem, cui, praemisso clystere, impositae fuere octo cucurbitae scarificatae, per quas non tantum magna sanguinis copia effluxit, sed pessima etiam secuta est haemorrhagia, quippe cruor enormiter dissolutus, totus per levia cucurbitularum foramina intra 24 horas effluxit, absque eo, quod ars nostra ei auxiliari potuerit, omnibus adstringentibus incassum adbibitis, sicque sensit per vulnera mortem.

En nunc exemplum in quo homo moritur a cucurbitulis scarificatis; ex parvis enim vulnusculis sanguis ad mortem usque non fluxisset, si vasa non spasmotice contraherentur & sanguis saepe magno cum impetu erumperet, hoc non explicare possumus si non supponamus spasmos.

Praeterea si nunc ad symptomata respiciamus quae haemorrhagias concomitantur, patet quod omnia sint spasmotica, perspiratio est impedita, quia vasa minima spasmotice contrahuntur, refrigerium extremorum adest, ob eandem rationem alvus est stipata, si nunc observemus morbos spasmoticos, inveniemus quod in illis aegris semper alvus non respondet, sed si tollatur morbus, illico saepe alvus bene sese habet. sanguis ruit versus interiora, urina secernitur tenuis, quod etiam observatur in hystericis, & multa sunt alia quae differunt pro ut differunt partes, in quibus haemorrhagiae fiunt; si hae partes in oculos incurrant e. g. in haemorrhagia narium clare videre possumus sanguinem versus caput determinari saepe momento citius.

Si nunc respiciamus ad morbos acutos, in quibus medicus haemorrhagiam expectat, nil facit quam promovere crisin, idest quando signa se offerunt instantis haemorrhagiae; quare? instituere potest venae sectionem atque sic sanguinis copiam minuere, sed quia per experientiam didicit quod illa haemorrhagia a natura (ut ita dicam) producta melior sit alia arte producta, nil facit quam promovere illam haemorrhagiam, sed quid est ratio? videtur mihi haemorrhagia critica dicta testari de solidorum statu, quia videmus quando haemorrhagia fit cum aegri levamine, idest quando omnia symptomata mitigantur, tunc dicit haemorrhagiam criticam esse bonam, sed licet magna sanguinis copia excernatur, si non sit cum levamine aegri, dicitur mala. quare? sanguinis copia minuitur, natura sese exonerat sponte? quia tunc spasmi non solvuntur per haemorrhagiam & saepe est indicium, quando morbus per aliquod tempus jam duravit, gangraenam adesse, hinc credo haemorrhagiam non dare bonum signum in morbis acutis, quia sanguis excernitur, nam hoc pro lu-
bitu

bitu facere possumus, sed quia saepe per haemorrhagias solvuntur spasmi.

Ex hisce nunc concludo, spasmus esse causam efficientem haemorrhagiarum, qua posita ponitur immediate effectus & 2^o plethoram esse causam materiale, licet nunc haec causa in corpore ante existat vel a spasmi in alia parte generetur, per se non haemorrhagiam producit, nisi causa activa accedat, idest quando spasmi orientur, sed quomodo hi spasmi afficiunt solida, adhuc latere videtur, haec satis de causa proxima, nunc de remotis.

§. X V.

Causae remotae sunt variae atque diversae, in duas classes dividam.

1^a Causarum remotarum classis erit, quae plethoram producere possunt, altera quae spasmus producere possunt.

§. X V I.

Causae, quae plethoram producere possunt, sunt diaeta lauta, vita otiosa, somnus multus, animus sedatus, in genere omnes causae, quae faciunt ut magna boni chyli & sanguinis copia in corpore nostro generetur, atque etiam omnes causae quae excretionem minuunt, consuetudo sanguinem mittendi sive sit naturalis, sive artificialis, ut E. G. homines qui consueti sunt sanguinem excernere, quotannis, bis, ter, quaterve, si haec excretio impediatur, oriuntur saepe multa mala, congestiones nascuntur & vasa (licet saepe sanguinis quantitas adhuc sit naturalis) adeo tenera sunt ob desuetudinem vehendi copiam naturalem, ut a naturali afficiantur stimulo & sic plethoram ad vires intelligere possumus, non quia sanguinis quantitas major est, ut maneret aequilibrium intra solidas & fluidas partes, sed quia vasa sunt desuetacta illi stimulo naturali, nascitur (ut ita dicam) quasi distentionis impatientia vel irretismus, atque ex illo irretismo

C

con-

congestionem ad unam alteramve partem fiunt, dicitur tunc adesse dispositio, ad haemorrhagias, licet vera plethora non adsit, atque hoc patet in puellis delicatissimis, pallent, corpus non movetur; digestio saepe est depravata, tamen a levissimo stimulo incidunt in haemorrhagiam E. G. menses fluunt saepius quam par est, non ob plethoram veram, sed quia vasa sunt desuefacta vehendi copiam naturalem, contrario videmus in foeminis robustissimis, quae multum excernunt corpora, plethoricae saepe sunt, sed non inde in commodum patiuntur, quia vasa sunt robustiora & consuefacta illi stimulo, inde etiam observatum est, illas foeminas minus sanguinem excernere in menstruatione ut Clar. Forestus ac Horstius testantur Rusticas mulieres multas absque fluxu sanas degere vitam, etiam Brassavolus in comm. ad aphor. Hippocratis 36. Lib. 5. *notae sunt inquit hodie rusticae, quibus nunquam menses fluxerunt, quamvis sanae degant & robustae sint, ac quod mirum, foetus producant.*

§. X V I I.

2ae. Classis sunt omnes causae quae spasmus producere possunt.

Ut sunt in genere omnes animi affectus, qui illico producant spasmus ut antea dictum est: omnes excretiones naturales sive artificiales impeditae ut E. G. foeces retentae in intestino recto haemorrhoides producere possunt: omnia acrimoniae ingesta, quae infinita esse possunt E. G. Victus ex cibis alkaliescentibus, aromaticis conditis, sanguis fit acer, perdit suam blanditiem: saburram ventriculi, saepe est observatum, causam esse spasmodum, ita ut sanguinis excretio nullo remedio compesci possit nisi emetico; etiam vitanda, sunt remedia ex aloe, helleboro atque aliis similibus: omnes morbi protracti corpora disponere possunt ad spasmus, si E. G. Venae Sectio saepe sit instituta vel excretiones naturales sint prohibitae, postea videmus, illa corpora maxime esse proclivia ad spasmos: etiam proclivia sunt corpora cachectica ad spasmus:

mum: in genere omnes viscerum obstructions & omnes causas, quae obstructions possunt producere & quae circulationem inaequalem faciunt atque sic producunt plethoram particularem, iis accedit vita sedentaria, saepe a stagnatione oritur dilatatio, a dilatatione irritatio atque sic producitur spasmus: in causa etiam esse potest materia arthritica vel podagrica ad intestina dilata.

§. XVIII.

En nunc memoravi aliquas remotas haemorrhagiarum causas, omnes enim recensere nimis longum foret, nunc dicendum superest de effectibus, qui producuntur ab istis causis antequam ad curationem pergam, ut facere possimus ex illis prognosin & diagnosin & sic cognoscere totum decursum hujus morbi.

§. XIX.

1^{mo}. Itaque distinguendi sunt effectus ante paroxysmum id est antequam sanguis fluere incipiat vel antequam vasorum ruptura sit facta, licet causa efficiens vel spasmus jam adsit.

2^o. In illis effectibus sub paroxysmo, quando rupta jam sunt vasa.

Effectus ante paroxysmum sunt vel communes omnibus haemorrhagiis in genere vel sunt particulares cuique proprii, itaque seorsim tractabo.

§. XX.

Effectus ante paroxysmum communes omnibus, sunt quando sanguinis circulatio, perturbatur, in parte vicina ubi spasmus obtinet, id est ubi vasa spasmodice contrahuntur, fiunt itaque sic dictae congestiones, fit sanguinis accumulatio, ab accumulatione vasorum expansio, ab expansione oritur dolor, sed in una parte magis quam in alia, quia non aequae sensibiles sunt omnes corporis nostri partes, atque a sanguinis ac-

cumulatione nascitur etiam stagnatio, a stagnatione obstructio & si tunc nulla vaforum ruptura fiat, nascitur inflammatio atque omnes ejus sequelae: Praeterea alvus est stipata, cutis est stricta, extremorum refrigerium observatur, pulsus est parvus, debilis, contractus, horror adest.

En nunc praecipui effectus haemorrhagiarum in genere ante paroxysmum: de effectibus cuique propriis nunc dicam, sed tamen tantum recensebo de haemorrhagiis, quae fiunt in locis suetis sic dictis.

§. X X I.

Si sanguis versus caput congeritur, ut inde nascatur *narium haemorrhagia* oriuntur vertigines, scotomiae, apoplexia saepe, si nulla eruptio fiat; pulsatio circa caput, collum & faciem, oculorum scintillae, capitis graviditas, aurium tinnitus, narium titillatio, observantur, lacrymae copiosae involuntariae saepe prorumpunt atque manuum tremor accedit.

In haemoptoe pectorum pressiones observantur, respiratio suffocata, dolor ad scapulas atque in dorso, anxietates magnae ad praecordia, sed fere nullus dolor, borborygmi atque faucium titillatio, dolor tensivus in hypochondrio sinistro.

De Vomitu cruento, signa antecedentia non sunt multa, praecipue sunt, quod omnia signa, quae antecedunt haemoptoen, non in vomitu cruento observentur, atque si adsint, leviora sunt, sed dolor punctorius tensivusque hypochondrii sinistri saepe observatur.

De fluxu haemorrhoidali tantum in genere dicam dorso atque lumborum dolorem adesse, crurum stuporem, oris fauciumque siccitatem, urinam parcam atque pallidam ponderis sensum & podicis dolorem, imo saepe de borborygmis queritur aeger.

Nunc dicendum superest de *Menstruorum fluxu* symptomata vel signa non admodum sunt clara, ut in aliis haemorrhagiis, quidem saepe quando pro prima vice erumpunt, sed non sequenti

sequenti in tempore, itaque illa memorabo, quae saepe observantur, licet non semper, quia saepe tacite quasi erumpunt.

Lumborum coxarumque dolor oritur, cum aestu atque gravitate harum partium, hinc ventris inflatio saepe sequitur, sicut & ad pudenda gravitas, mammae forariantur, crurum languor atque lascitudo, sub oculis circulus lividus, color faciei pallidus, urinae parcior fluxus, ad motum anhelitus, capitis dolor, nausea, vomitus, inappetentia &c. succedunt.

§. XXII.

Nunc absolvi, quid animi habeam de effectibus antequam vasorum ruptura est facta, 2°. restat de effectibus sub paroxysmo, quia fere omnia symptomata mutantur, sed quia idem ordo est mihi servandus. 1°. agam de effectibus ingenere atque 2°. de effectibus cuique haemorrhagiae propriis.

§. XXIII.

Si post vasorum rupturam in genere sanguini liber concilietur exitus, statim omnia mitigantur symptomata atque etiam mutantur, sanguinis accumulatio, dolores, expansiones, stagnationes, obstructiones minuuntur, cutis, quae antea erat stricta, nunc est laxa, transfudat aeger, extremorum refrigerium abest, saepe nascitur calor, pulsus qui antea erat parvus, debilis, contractus, nunc est acceleratus, durus, sic saepe per haemorrhagiam solvuntur spasmi.

§. XXIV.

Dicendum nunc restat de symptomatibus in specie sub paroxysmo, sed quia symptomata narium haemorrhagiae, haemorrhoidum atque menstruorum fluxus ex ante dictis facile intelliguntur, tantum dicam de Hoemoptoe & de vomitu-

cruento ut ex effectibus unum ab altero clare distinguendum sit nobis.

Si *Hoemoptosis* sit vera, adest oppressio strepitusque pectoris, tussit atque de titillatione profunda queritur aeger, respiratio non est libera, sanguis est floridus atque spumofus aere mixtus saepe per intervalla rejicitur, sanguinis sapor est subdulcis falsusve.

Sed si ex *faucibus* vel *ventriculo* veniat sanguis, tunc faucium titillatio adest, non pectoris oppressio, respiratio est libera, sanguis est mixtus mucos non aere.

§. X X V.

En recensui nunc haemorrhagiarum praecipuos effectus, de diagnosi in specie nil dicam, quia ex effectibus est quaerenda, sed antequam ad curationem pergam breviter aliquid addam de prognosi, licet etiam pro maxima parte ex effectibus ante paroxysmum sit quaerenda.

§. X X V I.

Prognosis in genere est, omnes haemorrhagias esse excretiones praeternaturales, praeter menses atque lochia; adeoque omnes periculosas, nisi tempestive supprimantur, sed minus sunt periculosae in subjectis plethoricis, truncatisve, vel assuefactis excretionibus & dum quasi habituales sunt factae, haemorrhagiae in illis non sunt sistendae, licet sanguis magna in copia excernatur, si aeger non admodum debilitetur atque non metus sit ut in cachexiam hydropemve incidat, quia non ferre potest aeger illam sanguinis copiam, si nunc prohibeatur excretio, saepe congestiones fiunt ad alia loca magis infueta & inde dira mala oriuntur.

Prognosis semper est mala, si corpora juniora afficiantur haemorrhagiis E. G. si juvenes passi sint narium haemorrhagias, puellae menstruationem ante ordinarium tempus, quia observatum est, hos juvenes in aetate consistente saepe laborasse

borasse hoemoptoe : puellae quae ante ordinarium tempus laborant mensium fluxu, sicut hae ita juvenes qui laboraverunt in juventute narium haemorrhagia, habent corpora admodum sensilia, proclivia ad omne morborum spasmodicorum genus atque saepe non ad consistentem aetatem veniunt.

§. XXVII.

In curatione indicationes primariae duplices sunt, scilicet curatoria atque praeservatoria idest sub ipso paroxysmo & extra paroxysmum.

Sub paroxysmo indicatio primaria est ut sanguis sistatur atque restituatur aequalis circulatio.

Extra paroxysmum ut dispositio ad haemorrhagias tollatur : hae duae indicationes satis fiunt medicamentis externis atque internis.

Sub paroxysmo indicatio est ut sanguis sistatur, si in immoderatam copiam effluat, idest si copia adeo sit magna ut aeger in vitae periculo versetur, si non sistatur, aliter sibi est relinquendus atque praecipue si effusio sit habitualis ut Laf. Riverius jam annotavit in *Lib. 4. Cap. 7.* de narium haemorrhagia.

Sic etiam sanguis, qui sine febre ex consuetudine fluit, cobibendus non est : sed naturae arbitrio relinquendus, nisi immoderatio fluxerit : multi enim per hujusmodi haemorrhagias periodicas, à gravissimis morbis immunes fiunt, in quos earum suppressione incidere consueverunt.

Ratio ex hypothese nostra est clara, quia congestiones manent & multoties videmus per haemorrhagias congestiones solvi atque aequalem circulationem restitui, sed si haemorrhagia adeo sit immodica ut sistenda sit, hoc fit medicamentis externis, internisque & quidem talibus, quae congestum serum & sanguinem partim a loco affecto abducunt atque revellunt, partim resolvunt atque in motum naturalem redigunt vasa.

Nunc 1^o. de externis sub paroxysmo.

§. XXVIII.

§. XXVIII.

Externa sunt varia atque multa.

1^o. *De Venae Sectione* ad Scopum ut revellatur atque sanguinis quantitas minuatur, itaque minor sanguinis copia ad partem affectam vehatur, etiam conducit quod congestio non adeo accrescere possit, quia in vasis liberis sanguinis copia minuta est atque saepe per venae sectionem solvuntur spasmi, egregium effectum praestat etiam Venae Sectio in corporibus plethoricis sive sit ad vasa sive ad vires, & quod optimum remedium sit in haemorrhagiis sistendis patet ex Galeno in Lib. de Sang. missione cap. 11. dicit se validas sanguinis fluxiones repente Venae Sectione sedasse.

Sed in cachecticis atque debilissimis corporibus, non adeo convenire videntur Venae Sectiones, & tamen illae indicationes in praxim reducendae sunt ad hoc, ut revulsio fiat atque sanguinis copia minuatur in parte affecta, tunc *artuum ligaturae* saepe praestantissimum effectum efficiunt, non minuitur sanguinis copia atque tamen omnes effectus quos a Venae Sectione exspectamus, eosdem ab illis ligaturis in spe habemus, sed ligaturae adeo debent esse institutae ut aeger per aliquot horas ferre possit, ne circulatio intercipiatur, in illis corporibus etiam *frictiones* conveniunt, sed circumspectio adhibenda est, ne per nimiam frictionem aestus inducatur sanguini.

Pediluvia atque *balnea manuum* etiam conducunt, sed bene attendendum ne aqua sit calida sed tepida, si aqua tepida sit, relaxantur vasa, sed si caleat, aestus inducitur sanguini, oriuntur spasmi atque sic contrarium effectum edunt.

Clysmata etiam sunt laudanda sed non acria adhibenda sunt, quia stimulantur intestino atque sic novi nascuntur spasmi, sed debent esse admodum blanda, tunc circulatio per abdomen libera redditur.

Cucurbitae a multis medicis laudantur, sed usum affirmare non ausim, saltem si adhibeantur, semper cum circumspectione

ctione adhibendas consulo, quia in illis locis ubi applicatio fit, nascitur saepe inflammatio, agunt stimulando, haec corpora admodum sunt sensilia atque a levi stimulo afficiuntur, & per cucurbitulas magis stimulantur corpora atque sic saepe spasmi per totum corpus propagantur, ut patet ex Ephemen-
dib. curios. cent. 9. obs. 8. haemorrhagiam lethalem ex scarificatione ortam esse.

§. X X I X.

Medicamenta externa ab auctoribus *Sympathetica* dicta sunt.

1°. *Tela araneorum* a Nicol. Chesneau in Lib. 3. in cap. 13. laudatur & tres observationes addit, in quibus bonum effectum edit, applicatur lumbis, pectini, fronti, pro ut differunt haemorrhagiae, hae telae debent cum aceto acerrimo in Sartagine frigi ut sic cataplasma inde fiat.

Lignum arboris fraxini, filices, ferrum aut *alia frigida*, si aeger in manu teneat, saepe sistunt haemorrhagiam, imo saepe *aqua frigida* in facie spersa vel nugi vel testibus applicata, haemorrhagia sistitur, sic *omnes animi affectus* hoc praestant.

Pulvis Sympatheticus a Clar. Wille laudatur, qui componitur ex Vitriolo romano per solem aestivum ad albedinem calcinato;

Saccus e Serico cui *bufo siccatus* includitur supra Scrobiculum cordis gestatus, saepe haemorrhagiam sistit.

Item *monilia ex lapide haematite* collo suspensa vel in manu gesta, de hoc lapide egregium effectum vidi in tribus personis laborantibus haemorrhagia, in quibus nullo modo sistebatur, medicus graviter agens, quod totum ab arte sine fructu evacuasset, tandem illo lapide applicato scrobiculo cordis vel in manu gesto, sistitur haemorrhagia in semi quadrante horae, sed lapide amoto, saepe sanguis iterum fluere incipit, sed hac qualitate non praeditus est lapis haematitis vulgaris, licet aliquid habere videatur de hac virtute.

A Riverio etiam laudatur *Gossypium* atramento infectum,
D admotum

admotum fronti atque a multis laudantur *finus porcinus asini-
nusque*.

§. X X X.

Dantur etiam medicamenta *topica* quae vaforum ora dehiscencia ocludunt, sed raro conveniunt, ut patebit quando agam de adstringentibus internis, nunc tantum recensabo.

Solutio vitrioli in aqua facta etiam aqua ex infusione *vitrioli albi* cum *bolo & camphora* parata, a Clar. Wille cum successu sunt usurpata, ab eodem auctore laudatur *Crocus martis* ad summam rubedinem calcinatus.

Cauterium actuale etiam in usum est vocatum, sed quod malum proferre potest patet ex Benjamin la Motthi tom 2. de homine qui ab infantia ad annum vigesimum quartum ex pollice manus patiebatur haemorrhagiam singulis mensibus ad libram mediam, pertaesus tandem huius mali, adusserat pollicis partem ferro candente & non patitur hanc haemorrhagiam verum post tres menses incidit in haemoptoen, variis tunc remediis a phthisi praeservatur sed postea in colicam incidit. Sed clare patet, si adhibendum sit, cum circumspectione esse peragendum.

§. X X X I.

Medicamenta interna sub paroxysmo in genere sunt antispasmodica, sed non omnia aequae tuta sunt: quod patet in opio, ab omnibus medicis *opium* pro maximo antispasmodico medicamento habetur, tamen non convenire hic videtur, quia per usum opii, quidem tolluntur spasmi, sed vita, vel irritabilitas sic dicta etiam minuitur, saepe in debilissimis corporibus nascitur congestio, vita languet, si detur opium quid sit, vita jam languens adhuc minuitur, praeterea tollo quidem spasmus, sed efficio, quod vasa non possint reagere in fluida, quia innepta reddo ad motum naturalem producendum, itaque sanguinis accumulatio manet in illa parte, nascuntur

cuntur stases, inde inflammationes, suppurationes, gangraena-
que itaque opium non videtur convenire, nisi in hominibus
robustissimis adhuc juvenibus, in senibus, foeminisque nun-
quam convenire potest, nisi casus sit desperatus, tunc appli-
care possumus, sed semper parva in dosi.

Sed loco opii adhibere possumus *Semen Hyoschiami* quod a
multis medicis in haemorrhagiis laudatur, sed de hoc postea
quando agam de pulvere Styptico Heurnii.

Syr. Papav. Alb. uncia una convenit cum grano uno opii,
vim narcoticam patet minorem esse atque ideo videtur tu-
tior opio.

Syr. Papav. Errat. adhuc minorem vim narcoticam possi-
det, itaque adhuc est tutior, sed majori in quantitate inge-
rendus est.

§. X X X I I.

Pergamus nunc ad medicamenta quae non irritabilitatem
tollunt, sed quae videntur tollere spasmos idest restituere to-
num naturalem vasorum, ista semper tuta sunt.

Nitrosa optima remedia videntur esse ad tollendos spasmos,
ut legitur apud Hoffmannum in tom. 2. in capite de Hae-
morrhagiis narium.

Praeter Venae Sectionem, *nitrosa* omnibus aliis, ad nimium
orgasum compescendum & relaxandas etiam spasticas partium
stricturas palmam praeripiunt, olim jam ipse Paracelsus nec non
Hildanus hoc sale tantum purificato, in omnibus haemorrhagiis
cum fructu usi sunt & Riverius in praxi & observationibus suis,
bujus remedii efficaciam in sistendis fluxionibus sanguineis non sa-
tis de laudare potest.

Camphora ut medicamentum antispasmodicum ab Hoffmanno
in haemorrhagiis laudatur, praecipue si cum nitro misceatur,
vel etiam si camphora cum oleo amygdalarum solvatur, sed
multae sunt lites inter medicos an vi polleat refrigerante an
calefaciente, sed quia naturam spasmorum ignoramus, non
determinare possumus, quam qualitate praedita esse debeat,

ut tollere possit spasmos, praeterea ignoramus an camphora habeat qualitates nobis incognitas, itaque nil superest quam ut ratiocinemur ex effectu quem videmus, sed quod sit medicamentum antispasmodicum legere potes B. L. apud Clar. Hauksham atque Clar. Winterus sanavit epilepsiam per Camphoram.

Spir. Corn. cervi cum oleo vitrioli Saturatus in actis Phys. med. tom. 7. obs. 15. haemorrhagias atroces cohibuisse legitur, quod hoc medicamentum sit optimum antispasmodicum multoties vidi in Collegio casuali Clar. Winteri, datis hominibus laborantibus epilepsia, convulsionibus & similibus morbis spasmodicis semper cum bono effectu, tutus videtur usus hujus, quia non adstringit sed refrigerat.

Ab Hoffmaano *Spir. Vitrioli* laudatur dilutus cum aquosis, etiam a Clar. Wille laudatur ad sanguinis effervescentiam sedandam in infusione.

℞. aq. hordei ℥ ij.

flor. Rosar. rubr. m. j.

sp. vitr. ad gratum acorem sive circiter 3℥.

fit infusio tepida ad tincturae extractionem adde

fyr. de succo hyperici 3 ij.

Dosis 3 ii j. v. iv. ad libitum saepius in die vel noctu.

Pro potu conveniunt acida ut serum lactis lac ebutiratum, succus citri cum aqua hordei, saepe acetum praestat bonum effectum mixtum cum aqua ut legitur apud Riverium in observat. pag. 471. testatur se curavisse haemorrhagiam solo oxycrato quod est aceti cum aqua mistio, vocatur etiam pusca vel posca, emulsiones ex seminibus iv. frig. majoribus & minoribus atque similibus etiam locum habere possunt.

§. XXXIII.

Sed si haec omnia in cassum sunt adhibita, ad fortiora saepe confugiendum est, idest ad narcotica & adstringentia, ad hunc scopo satisfaciendum a multis medicis laudatur *Pulvis stypticus Heurnii* constans ex adstringentibus & anodinis, atque praecipue in hoemoptoe a Laur. Heistero in compendio medic. laudatur, ita sese habet.

℞. Sem. Hyoscyami albi

— papav. albi ana ʒj.

Lapi haemat. ppt.

corall. rubr. ppt. ana ʒʒ.

camphorae ʒʒ.

M

Detur subinde ad ʒj vel ʒʒ ex aqua simplici vel distillata aut julepo acidulo.

Sed si adhuc magis fortiora requirantur, danda est *potiuncula adstringens Sylvii* paratur hoc modo.

℞. Aq. burs. pastoris ʒiiij.

— equiset.

— plantaginis ana ʒij.

— Cinnam. cydon. ʒj.

Corall. rubr. ppt.

lap. haematit. ana ʒj.

Syr. granator. ʒj.

Laud. opiat gr. j. vel ij.

M.

quavis dimidia hora, donec haemorrhagia remittat, cochlearia duo vel tria exhibeantur.

Adstringentia sunt multa ut *Lap. haemat. terra sigillata, bol. armen. terra catechu, crocus martis adstr. sang. dracon. corall. rubr. ppt.*, imo *alumen* ipsum atque ab Helvetio in libello gallico cujus titulus est *traité de pertes de sang* ut optimum specificum in morbis desperatissimis laudatur, sed in genere dicam de cautelis observandis in usu eorum.

D 3

Ad-

Adstringentia non sunt adhibenda nisi in morbis desperatissimis, ubi omnia frustra sunt tentata, quia nil faciunt quam claudere vasa vi sua adstringente, itaque congestiones manent atque omnia mala quae ab opio sunt spectanda, hinc etiam locum inveniunt & praeterea magis adhuc vasa inepta reddunt ad agendum.

Si E. g. quis laboret narium haemorrhagia atque velim per adstringentia curare & nil aliud faciam quam prohibere ut per vasa nasalea fluere non possit sanguis, congestio manet, ruit sanguis versus partes nobiliores, saepe ad pectus, sed si quis nunc laboret hoemoptoe, an tunc conveniunt? minime, quia observatum est, quando in hoemoptoe adstringentia sunt adhibita, semper fere sequi phthisin, etiam in immoderata menstruatione adhibere non audeo, quia vasa inepta reddo atque sic tempore statuto nulla excretio fit, itaque B. L. patet, usum horum non in multis casibus locum invenire, nunc dixi de medicamentis externis, atque internis sub paroxysmo nunc dicendum restat, de curatione extra paroxysmum.

§. X X X I V.

1^o. Si Haemorrhagia sit coercita per opiata vel adstringentia, abstinendum est illico ab illo usu, instituenda est venae sectio, scopo revellendi atque haec ter quaterve in anno est repetenda pro ut circumstantiae exigunt.

In genere cavendum est aegro ab omnibus animi affectionibus, in diaeta ab acris aromaticis, ab nimio carnum usu, a vino atque praecipue a generoso spirituosoque sed si corpus admodum sit debile, convenit tunc vinum mosellanum rhenanumve modo sit in moderata quantitate haustum, motus corporis sit moderatus, vectio in curru, equitatio, si moderate fiant, sunt bonae, a frigore sibi cavendum est, per frigus enim perspiratio imminuitur, quia vasa capillaria spasmodice contrahuntur atque sicut sanguis versus interiora pellitur, sic etiam curat aeger ut omnes excretiones naturales bene

bene procedant, praecipue alvus aperta servetur (nam a solo stipata alvo possunt oriri ingentes turbae atque spasmi) sed hoc faciendum est per laxantia excoprotica ut sunt *Cassia fistula*, *tamar indorum*, *passulae majores*, *minoresque prunae*, *mel*, *manna*, *tartarus*, *cremor tartari* imo *Rhabarbarum* abstinendum est a fortioribus, quia semper stimulando agunt, corpora haec nunc admodum sunt sensilia, idest ploclyvia in spasmos, si nunc haec corpora per fortiora purgantia adtingere velles, orirentur spasmi, inde congestiones.

Diaeta sit victus blandus refrigerans ex oleribus, haec alimenta non admodum nutriunt corpora atque tamen satiatur homo, sed si sit phlegmaticus convenit melius jus carniū praesertim pullorum aut gallinarum impregnatum succo citri, etiam juscula ex avena, hordeo atque oryza parata ut & gelatina ex pedibus vitulinis, cornu cervi aut ebore confecta; sed ad illam dispositionem tollendam egregium effectum praestat lac in larga copia quotidie haustum, quod jam ab *Hoffmanno* est annotatum, dicit se cognovisse hominem qui laborabat profusione sanguinis ex pulmone, & qui solo lacte caprillo cum floribus papav. Rhaeados cocto, admixta dimidia aquae parte atque adjecta portione mellis, quotidie largius assumpto, egregie restitutus est.

Aquae minerales etiam conducunt, praecipue sunt selteranae, emsenses, Windungenenses, spadanae & similes praecipue si cum lacte misceantur, sed nocent aquae carolinae, pyrmontanae, egranae, sedlicenses, quia sunt imbutae sale copioso acri & alcalino.

Cort. peruv. ad tollendam istam dispositionem etiam laudatur ut videri potest in compendio Laur. Heisteri in capite 8vo. par. 19. de hoemoptysi ubi dicit.

Corticem peruv. cum pulvere absorbente Wedelii, partibus aequalibus remixtum in hoc morbo tam curandi, quam praeservandi gratia, valentissimum ac certissimum suaeque experientia saepius confirmatum esse remedium, hoc ipso, quo haec scribo die per litteras me certiore fecit Doct. D. Wagnerus Lubeccensis.

Quod vi roborante polleat, nemini incognitum erit atque quod robores alio modo quam corroborantia in genere idest calefaciendo omnibus cognitum est, itaque patet quod optimum remedium esse debeat in haemorrhagiis, quia indicatio est vasa roborari tamen non stimulari, praeterea videtur agere in solida atque restituere tonum naturalem vasorum atque quod vim antispasmodicam possideat patet quia in omnibus morbis spasmodicis bonum effectum praestat, saepe vidi a Clar. Wintero in morbis spasmodicis adhiberi magno cum effectum, imo in epilepsia ipsa, quod etiam vidi a Clar. a Swieten practicum; sed semper respiciendum est, an non circumstantiae adsint quae contrarium indicent. V. G. si obstructione viscerum simul laborat aeger, non convenit, si tollenda sit, tolli debet, atque usus hujus corticis tunc convenit, sed debet esse protractus, saepe purganda est alvus atque cavendum est aegro ab omnibus ante monitis.

T A N T U M .

